

四庫全書

史部

欽定四庫全書

史部

續資治通鑑長編卷四百八十四至

詳校官檢討臣劉錫五

刑部郎中臣許兆椿覆勘

纂修官檢討臣彭元琬

謄錄貢生臣郭墉

欽定四庫全書

續資治通鑑長編卷四百八十二

宋 李燾 撰

哲宗

元祐八年三月戊寅朔

辛巳御史中丞李之純言衆賢和於朝則萬物和於野
至於形和聲和則天地之和應矣今仲春之末生育之
候而風霾間作繼以大寒霰雪雨水有戾和氣殆人事

有以干之者夫變理陰陽輔臣之職比聞國論稍虧協
睦語或傳播動繫觀望普臯陶曰同寅協恭伊尹曰惟
和惟一蓋計謀密勿運動樞極言雖忽微其出彌大不
可不謹重協和望深加訓諭責其同德上代天工以召
至和之氣

國論稍虧協睦當考其事

臣僚上言今者春務方興農

桑維時而愚民陷罪者衆宜隨輕重決遣以赴耕耘之
業請非灼然要切事不得妄有追擾其獄事須證逮者
立遣從之 將作監王兢為京東西路轉運使

政目四
日事四

年七月以朝奉大夫權京西提刑改秦鳳五年
六月二十二日農少六年閏八月十四日將作

壬午詔尚書右僕射蘇頌累上表引年乞解機政可依
所請特除觀文殿大學士充集禧觀使所有實封食邑

依自來體例施行於今月六日宣麻

此新錄據御集手
札便書御札云云

略不修潤
今亦從之

癸未左光祿大夫尚書右僕射兼中書侍郎蘇頌依前

官觀文殿大學士集禧觀使

政目十六日
頌依前使相

初進呈臺章

論頌稽留制書尚書左丞梁燾曰頌為宰相理會差除

可謂稱任矣况論差除執政皆得可否為相復不得論
本省事乎臺章又以頌子為太學博士同舍多有遷擢
燾曰差除皆宰執合議方敢將上取旨如一有不同又
且罷議非頌敢專也至如父子家庭間語外人豈得知
之若臆度猜疑即誣造巧飾何所不至此不可不察頌
既罷相以觀文殿大學士宮祠便居燾又爭曰頌罷已
非宜願兩宮察言者之妄留頌以遏傾搖之風朝廷輒
罷免宰相事體極重太皇太后曰自是頌不肯住燾曰

若用自請即職名非故事不可降職處外以示疎遠頌

得以大學士留京師

邵伯溫云楊畏攻劉相出意謂必相門下侍郎蘇轍朝廷復拜蘇頌

為右僕射畏又與來之邵言蘇相留賈易謫命不下為稽留詔命時中丞李之純與蘇相為姻家偶在病告畏入卧內見之純曰臺諫言蘇頌章累上未有施行公與之連姻託病在告恐言者將及李公長者為畏所劫亦上章言臣僚論蘇頌章疏乞早降出施行蘇相遂罷太皇太后察見楊畏等私意復自外召范純仁拜右僕射畏與之邵又言純仁不可用不報之純與頌為姻家當考實錄不載之純有言亦當考餘已見二月二十九日伯溫作楊畏傳云呂相大防喜子安除工部員外郎劉相摯亦喜之下遷子安為監察御史欲其為助子安復為呂相攻劉相出之又攻蘇相頌出之子安與蘇門下轍同為蜀人連攻二相欲蘇門下為相而宣仁后復自

外召拜范忠宣公子安又言之不從呂相不知劉相亦喜子安遷殿中侍御史以賞其言畏下遷察院六年四月二十四日已辨之遷殿院以賞其言又不然也畏七年六月已自殿院遷侍御史矣或指侍御史猶可已見七年六月二十二日李清臣與許將書云容功之罷雖言者乘之殆別有謂非而敘莫悉也不知清臣所稱別有謂是何事豈即邵伯溫所記楊畏反復攻擊為蘇轍乎當考七年十二月二十八日蘇轍謂范百祿之罷由議汝遮事并考百祿罷在三月十四日

三省言除名勒停人前左班殿

直王宗正訟謝景溫初宗正為真定路安撫司指使犯自盜贓法當死特貸命除名送賀州編管挾怨忿過京師訟景溫故入極刑指景溫嘗與屬官語吳處厚訐蔡

確事而處厚死若有異意語涉譏詆呂大防曰宗正凶人自抵於法今以語言訟景溫未明虛實太皇太后曰怨人言語不可行又曰蔡確已死此人姦邪朋黨為害

得它如此是國家福大防曰此是天誅前一日新州以

確死聞故有此宣諭

確死在正月
初六日

翰林學士顧臨等言

準朝旨令侍從官集議皇地祇事內太常博士孫諤奏為太社太稷設樂架等按開元禮祭社稷設歌磬今只於社壇設登歌實為有闕乞從本官所請外有社稷添

用宮架并其餘大祠亦合添用宮架不行餘從之

諫奏在七

年三月十八日臨等上議在八年三月八日今移見此嫌與范百祿事相間也玉牒云詔祀社稷用樂

乙酉中書侍郎范百祿奏臺官言蘇頌稽留賈易知蘇

州詔旨累乞罷免劾章所指雖不及臣臣實何顏苟逃

罪戾已面奏不敢入省供職詔不允 太府卿程嗣恭

為將作監

政目初六日事

禮部侍郎林希出知亳州

此政目八日事二月

十三日來之邵云云

左朝散郎知亳州朱光庭為集賢殿修撰知

潞州初劉摯罷相光庭為給事中封還詔書坐是以本

官出守至是復職

政目有此新錄在二月二十九日今從政目

詔權侍郎

除帥臣依權侍郎初諸部置權侍郎位在正侍郎下俸

視諫議大夫不賜金帶餘並依從官范子奇自權戶部

侍郎以集賢殿修撰知慶州止得庶官恩例

八年二月八日子

奇自言於朝乃降此詔前此權侍郎未有作帥者作帥

自子奇始子奇權侍郎纔一年有半及至慶踰半年通

及二年乃除寶文閣待制亦自子奇始

此據韓駒南牕雜記修入子奇

六年十一月十八日以集撰知河陽入權戶侍八年二月八日自戶侍又以集撰知慶州紹聖元年二月八日

自集撰
除寶制

監察御史黃慶基言宰臣蘇頌近以稽留制

書援引親黨除授不當罷政按除授差遣自係中書省
同共商議方可進呈今來蘇頌既罷所有中書侍郎范
百祿實預職事豈可不任其責如百祿以為不知則同
在中書事無不總安可以為不知也如百祿知而曲從
則其罪有二一則朋比宰相欺罔朝廷不守典法是不
忠也一則內懷險詐恣頌所為陰圖傾奪是不正也衆
論喧騰皆以為殊失大臣之體望賜罷黜以慰中外之

論侍御史楊畏言近論列宰臣蘇頌沮遏詔命等事頌
已罷去竊惟稽滯制書雖出於頌而中書侍郎范百祿
既同職事實亦瘕官伏望施行以儆在位監察御史來
之邵言近論奏宰臣蘇頌徇私滅公遏塞詔旨頌既罷
政然挾情之私雖出於頌而中書侍郎范百祿既同職
事無所建明亦不能逃連坐之責

戊子慶基又言近論列中書侍郎范百祿與宰臣蘇頌
同在中書所有除授不當自合均任其責按百祿非特

朋比欺罔不守典法內懷險詐陰圖傾奪而已其狠愎
自任援引黨與皆有顯然事迹按百祿自執政以來援
引呂陶為起居舍人岑象求為諸王位說書皆川人也
陶為右司郎中象求為戶部郎中各不及半年固非久
次良由曲意主張所以驟加進擢假朝廷之名器而收
私室之恩其罪一也至如以宋炤知鳳州扈充知利州
亦皆川人也鳳州職田供給號為優厚初除沈邁待闕
已久乃差邁知泉州以鳳州與炤衆論莫不為之扼腕

其罪二也馮如晦為戶部郎中坐前任夔州路轉運使
日按發公事不當御史臺究治未結絕間百祿以其同
鄉遽除館職差知梓州且凡有案在寺者尚不許注授
差遣豈有見係究治未見罪名乃先除大藩更加館職
違朝廷之法徇鄉里之私其罪三也百祿頃曾相大河
利害是時力以回河為非北流為是及去歲大河復向
東流獻議者屢陳其便乞遣近臣相視可否而百祿固
執前日之所見力行沮格竟不聞遣使相視遷延至今

春水泛漲已無及矣其狼懷自用執一偏之見而沮公
共之議其罪四也為人臣者無有乎已况敢顧其私乎
豈有久待闕次而奪與它人見係究治而驟加進用上
罔聖明下紊綱紀擅威福之權行邪枉之道其罪五也
望出宸斷早賜罷黜以協公論

本傳云慶基論百祿與
蘇軾蘇轍朋比此章乃

無軾軾名當考十二日又一章言宋炤
知鳳州扈充知利州馮如晦知梓州

己丑尚書省言諸路廂軍兵士今闕額數多蓋為轉運
司吝惜所支衣糧請受致招填不足詔令逐路提刑司

嚴切催促須管招及額其合支衣糧料錢並拘管封樁
監察御史黃慶基言近論奏中書侍郎范百祿朋比
欺罔狠愎自任援引黨與皆有顯然事迹竊謂仕至執
政富貴亦已多矣然猶不守公忠援引黨與者無它乃
欲擅權勢而固寵利爾浸淫日久臣恐其不止於權勢
寵利而已也陛下可不深慮耶前日陛下罷黜劉摯王
巖叟朱光庭孫升韓川輩而後洛黨稍衰然而洛黨雖
衰川黨復盛矣百祿之親戚朋游皆在權要陛下可察

而知也今因罪狀明白早賜罷黜以離其黨與庶使當路者有所畏憚不敢招權徇私以欺罔聖明不然臣恐其權勢益盛黨與益多牢不可破則潰亂紀綱蓋未已也方陛下垂簾聽政之時正宜時出英斷使臣下咸知警懼不敢公為蒙蔽然後朝廷尊而綱紀正矣臣聞唐文宗之世牛僧孺李宗閔楊虞卿之徒交結朋黨遂亂天下文宗至臨朝興歎然終不能去也豈非變詐百端足以熒惑人主之聽乎前史譏之以為持不斷之慮者

開羣枉之門臣初見百祿進用一二鄉曲親舊固未以
為然既而進用益多論議騰沸乃知其果無體國之心
唯欲恣其不法而已伏望斷自宸衷而行之則可若詢
諸近臣則同類必曲為辭說以上惑聖聽臣備位言責
願竭孤忠故不畏衆怒力為盡言蓋欲大臣守公正小
臣循分義名器不假於人威福不移於下而後至治可
期也

此據編類章疏八年三月十二日奏

庚寅禮部言檢準元豐禮部令諸開科場每三年於季

春月朔日取裁本部勘會昨元祐五年發解至今已及
三年詔所有今歲科場依例施行翰林侍講學士范
祖禹言臣前上仁皇訓典願陛下法則仁宗宜以至誠
好學為先今因進講月令聖人奉天之事臣竊以畏天
者莫如仁宗故願陛下先誠於事天臣聞聖人之事天
也非在於七日戒三日齋執圭幣以饗園丘之時也天
之佑聖人也亦非在於祭則降福之時也聖人無一日
而不事天天無一日而不祐聖人昔堯授舜舜授禹皆

曰天之歷數在爾躬夫帝王之興受天眷命豈一朝一夕哉由其積行累功素合於天也臣伏見自去冬郊祀以來天人協應風雨時若豐年之祥此乃皇天饗佑陛下至誠之所感而自仲春以來暴風雨雪寒氣過甚節令不時豐年之祥復未可必夫天之於人君亦猶人君之於臣下也小過則戒敕之若其不改然後責罰加焉人君覩小異而不儆戒則大異將至矣是以洊雷震則君子恐懼修省迅雷風烈孔子必變敬天威怒也惟陛

下戒之慎之無忽天地之小異側身修行以消大異於未然則天心常悅人心常和四海幸甚 左朝散郎舒

煥校對秘書省黃本書籍

政目十三日事明年六月十三日出

臣僚上

言蠻夷之俗不知禮法與中國誠不同若其戀父母骨肉保惜山林土田資產愛生而懼死其情一也肯無故以其身試白刃哉故蠻夷不寧必有所因或邊人侵迫之邊吏不才不能禁止或邊吏倖功賞造事端如此之類情偽多塗蠻夷性獷急一旦發狂操兵捐軀拒命以

關朝廷萬里惟邊臣一面奏報而蠻夷終無路自明本
心遂使朝廷專治蠻夷蠻夷或怨漢而生事之人每立
於二者之間誅謫不加焉及其事平則又有從而得賞
者此邊鄙之深患也謂宜自今廣西湖南北益利梓夔
路凡有邊事必量事大小差本路監司或別差官並躬
詣體量因依聞奏若生事有實狀必正典憲詔荆湖川
廣南路今後邊事如因生事所致及申發不實除帥司
自合按舉外亦許監司覺察聞奏

此據成都邊界冊元祐八年三月十三日

樞密院

劄子

辛卯中書侍郎范百祿奏蒙賜詔書依舊供職者國法有常人言可畏雖善貸之明不惑而愚臣之分難安伏望聖慈亟加必罰以為小人之福以警在位之臣詔以百祿為太中大夫充資政殿學士知河中府初罷百祿不除職尚書左丞梁燾爭之乃有是命

百祿不除職政目據梁燾行狀

蘇轍遺老傳云范百祿罷政實坐努扎按實錄乃有黃慶基楊畏來之邵劾章不知轍何以云爾當考又李清臣與許將書云容功之罷雖言者乘之殆別有謂非面殺莫悉也不知清臣所稱殆別有謂是何等事當考

左司諫虞策言蘇頌罷相臣備言職朝廷進退宰相
宜有論列而臣竊自念頌於元豐年中曾薦舉臣在臣
之心誠恐近薄有愧風誼以此不敢入文字臣之尸職
無所辭誅乞除臣一小州差遣詔不允

癸巳知鄭州王巖叟知河陽府知河陽府范純仁知潁

昌府

實錄在二
十五日

知潁昌府安燾知河南府

政目有此燾
傳但記知潁

昌不記
知河南

天章閣待制知鄭州趙君錫知陳州

實錄二月
二十九日

君錫自陳改鄭州當考君錫
傳亦自鄭移陳恐實錄誤

乙未觀文殿大學士集禧觀使蘇頌言冬春以來內感寒壅發則幾於委頓伏望許上封章俾還閭里詔不允除大朝會外仍特免朝會 新權戶部侍郎章淦知同州言者論淦環州之役所上失亡數不實又縱賊使全而歸戶部侍郎非淦能任故有是命

淦除戶侍在正月二十三日改同州

實錄不載今從政目係之三月十八日去年十月十二日環州被圍淦遣將追擊有功召權戶侍必由此尋以言者論列左遷言者姓名當考李清臣小簡頗及淦事今具注於後舊錄既闕新錄又不能補填史官疎略如此可嘆也李清臣與知定州許將小簡云北方極靜牛溫仁決不來矣夏羌圍環州劫慕恩族磔瘠無宿藏留

數日無所得章帥以兵將間道邀擊之獲級四百得橐駝幾千頭馬四百八十匹羌衆遁去朝廷遣使有所賜章質夫臨老乃有戰多耶茲亦怪事太原小出獲不甚多又與太原韓縝云羌人抄環劫慕恩族將帥出兵邀擊之獲橐駝千馬四百八十集甲首三百八十羌酋遁去朝廷遣使賫帛賜有功者章質夫懦甚乃有戰多耶斯亦異事矣此中得謀者言遼人為夏國求援羌牛溫仁來泛使已而聞夏國黜集頻數部族疲於奔命議臣謂不能為中國大害豈可為他夷失我朝舊好耶遂罷溫仁之來即不審信然否然遼人亦自顧有遼遼之役戰頻不勝西京奉聖州一帶調發未已因書及此又與許將云容功之罷雖言者乘之殆別有謂非面殺莫恣也章質夫左遷夏羌遣使求款而犯延麟皆在三月陝塞易帥紛紛新官又不時至邊事極可防虞范相左目廢右目不任西洛文牘之繁且倦應接賓客意欲穎昌安厚卿謀居洛求洛已數月矣各從其便也又與范純

粹云質夫竟坐失亡減數縱賊使全而歸抑亦命也羌人昨自遣使才入境即耒耜雲集近邊一二百里耕種殆無閑田彼此方議和無由出掠昨折可適乘熟戶憤痛出邀戰果有克獲而我兵頗多自掠吾人者止罰可適三十斤不復究治兵輩甚愜機會也慶節乃公舊治故以所聞及之爾北報無他戎主近多服藥戎孫性克殆如其父

己亥國史院進神宗皇帝紀草先是翰林侍講學士兼修國史范祖禹言臣伏見仁宗時蔡襄上真宗所製奉神述摹本仁宗拱立命襄進讀神宗御資政殿史臣進仁宗英宗紀草神宗立聽顧問至讀畢撤案史臣將降

階始坐此皆祖宗孝德嚴奉先之禮也臣本院近奉聖
旨二十二日進呈神宗紀草伏緣其日係大宴前一日
御集英殿獨看恭惟陛下覽先帝史冊甫畢即觀百戲
理似未安伏望聖慈特降指揮罷二十二日獨看以示
陛下聖孝欽宗神考大典專一之意從之 尚書禮部
言西京留守范純仁等奏本府轉運司與吏部侍郎范
純禮同相度得永裕陵角堠只是些小偏斜難以遷改
欲更不再移從之

庚子詔皇弟諸郡王國公出就外學各賜九經及孟子荀揚各一部令國子監印給 中書省言進士御試答策多係在外準備之文工拙不甚相遠難於考校祖宗舊制御試進士賦詩論三題施行已遠前後得人不少況今朝廷見行文字多係聲律對偶非學問該洽不能成章若不復行祖宗三題舊法則學者未知朝廷所尚檢會已降指揮將來一次科場如有未習詩賦舉人許依舊法取應解發各格人不得過解額三分之一已後

並兼試詩賦取到國子監狀太學見管生員二千一百
七十五人內二千九十三人習詩賦八十二人經義不
兼詩賦以此可見中外學者習詩賦人數極多詔來年
御試將詩賦舉人復試三題經義舉人且令試策此後
全試三題其雜犯舉人未得黜落別作一項聞奏

元符元年

八月孔武仲傳云武仲為著作郎論科舉之弊詆三經
新義請復詩賦取士未幾復詩賦科兼用經義又疏請
罷大義而益以諸經義二篇御試復用三題按武仲為
著作郎乃元祐四年七月至八年四月自中書舍人遷
給事中自給事中五月遷禮部侍郎今中書建請未必
非武仲發之三年九月九日已有此指揮然訖不行政

目在二十三

日今從實錄

士寅資政殿學士知揚州許將知大名府

癸卯翰林侍講學士范祖禹為翰林學士兼侍講學士

祖禹力辭不許又力辭兼侍講學士曰臣伏見仁宗之

初孫奭為侍講學士凡七年乃兼龍圖閣學士馮京避

親除侍讀學士後為翰林學士不兼侍讀神宗初司馬

光呂公著皆以翰林學士兼侍講初不兼學士之職臣

叔祖鎮再入翰林治平中以侍講學士知陳州神宗召

還復為翰林學士亦止兼侍讀不帶學士臣於去歲蒙
除禁職聖恩許避親嫌改授侍讀學士今復蒙申前命
遂兼舊職是臣因避親嫌不朞歲得兩學士在臣之分
夫豈敢安朝廷如不許臣辭免新命又以臣久在經筵
仍令兼職即乞依舊例止兼侍講不帶學士則於職事
無改而不違典故乃詔以翰林學士兼侍講

改命在四月八日今

并書政目除內翰在四月四日

中書舍人孔武仲為給事中

政目二十六日

實錄在四月十四日

給事中范育為戶部侍郎

政目二十六日實錄無

河東

路轉運副使朱勅為右正言

政目二十六日事實錄無此七年十月勅以京西運

副改河東令不知自何官入六年九月二十七日范祖禹薦勅勅時任京西運判紹聖四年四月六日又二十

三日以右司諫論事閔

四月五日為河北運副

甲辰尚書省言勘會諸路常平廣惠坊場錢物文帳並

係年終具帳供申有妨照使令戶部指揮諸路提刑司

將常平廣惠坊場助役錢文帳每年作上下半年依條

式具帳供申其元豐八年後至元祐三年即依元豐八

年後來未行役法已前免役錢物帳每季具帳供申從

之

上親祠南郊之月蘇軾言臣聞穀太賤則傷農太貴則傷末是以法不稅五穀使豐熟之鄉商賈爭糴以起太賤之價災傷之地舟車輻湊以壓太貴之直自先王以來未之有改而近歲法令始有五穀力勝稅錢使商賈不行農末皆病廢百王不刊之令典而行自古所無之弊法百世之下書之青史曰收五穀力勝稅錢自皇宋某年始也臣竊為聖世病之臣頃在黃州親見累歲穀

熟農夫連車載米入市不了鹽酪之費所蓄之家日夜
祝祠願逢饑荒又在浙西累歲親見水災中民之家有
錢無穀被服金珠餓死於市皆官收五穀力勝稅錢致
商賈不行之咎也臣聞以物與人物盡而止以法活人
法行無窮今陛下每遇災傷捐金帛散倉廩自元祐以
來蓋所費數千萬貫石而餓殍流亡不為少衰只如去
年浙中水災陛下使江西湖北雇船運米以救蘇湖之
民蓋百餘萬石又計糴本水脚官費不貲而客船被差

者皆失業破產無所告訴與其官私費耗為害如此何似削去近日所立五穀力勝稅錢一條只行天聖附令免稅指揮則豐凶相濟農末皆利縱有水旱無大饑荒雖目下稍失課利而災傷之地不必盡煩陛下出捐錢穀如近歲之多也今元祐編敕雖云災傷地分雖有例亦免而穀所從來必自豐熟地分所過不免收稅則商賈亦自不行議者或欲立法如一路災傷則鄰路免稅一州災傷則鄰州亦然雖比今之法小有疏通而隔一

路一州之外豐凶不能相救未為良法須是盡削近歲
弊法專用天聖附令指揮乃為通濟若行臣言稅錢亦
必不至大段失陷何也五穀無稅商賈必大通流不載
見錢必有回貨見錢回貨自皆有稅所得未必減於力
勝而災傷之地有無相通易為賑救官司省費其利不
可勝計今肆赦甚近若得於赦書帶下光益聖德收結
民心實無窮之利是月軾又言臣聞應天以實不以文
動民以行不以言去歲扈從南郊親見百姓父老瞻望

聖顏懽呼鼓舞或至感泣皆云不意今日復見仁宗皇帝臣尋與范祖禹具奏其狀矣竊揆聖心必有下酌民言上繼祖武之意兼奉聖旨催促祖禹所編仁宗故事尋已上進訖臣愚竊謂陛下既欲祖述仁廟即須行其實事乃可動民去歲十一月七日曾奏乞放免五穀力勝稅錢蓋謂此事出於天聖附令乃仁宗一代盛德之事入人至深及物至廣望陛下主張決行尋蒙降附三省遂送戶部下轉運司相度必無行理謹昧萬死再錄

前來劄子繳連進呈伏願聖慈特賜詳覽若謂所損者小所濟者大可以追復仁宗聖政慰答民心即乞只作聖意批出施行若謂不然即乞留中更不降出免煩勘當貼黃稱臣所乞放免五穀力勝稅錢萬一上合聖意有可施行欲乞內出指揮大意若曰祖宗舊法本不收五穀力勝稅錢近乃著令許依例收稅是致商賈無利有無不通豐年則穀賤傷農凶年則遂成饑饉宜令今後不問有無舊例並不得收五穀力勝稅錢仍於課額

內閣除此一項臣昧死以聞

從違當考十月二十三日可考

門下侍

郎蘇轍奏臣近以御史董敦逸言川人太盛差知梓州
馮如晦不當指為臣過遂具劄子及面陳本末尋蒙德
音宣諭深察敦逸之妄而以臣言為信臣德望淺薄言
者輕相誣罔若非聖明在上心知邪正所在則孤危之
蹤難以自安竊詳敦逸所言謂馮如晦事乃其前狀所
言之一則其餘事不可不辨遂乞一一付外施行復蒙
再三宣諭以謂其它別無實事伏惟聖恩深厚知臣愚

拙曲加庇護仰涵恩造死生不忘然臣忝備執政知人
言臣過惡而默然不辨實難安職陛下愛臣雖深而不
令臣得知敦逸所言臣竊有所未諭也若敦逸所言果
中臣病何惜使臣引去以謝朝廷若敦逸所言非實亦
使臣略加別白然後出入左右粗免愧恥如不蒙開允
非所以為愛臣也所有董敦逸言臣章疏伏乞早賜付
三省施行敦逸前奏不傳此初十日所奏後奏云臣近具奏乞
減殺川人太盛之勢及乞廣為體訪等事已塵聖覽今

採衆言有合開陳下項一訪聞蘇軾蘇轍范百祿輩各有奏舉及主張差除之人惟蘇軾為多或是親知及其鄉人有在要近有在館職有為教官有作監司有知州軍不可以數考是致仕路有不平之歎中書省尚書吏部須籍姓名乞指揮供具便見員數之多寡事勢之何如

臣今月初十日有狀乞留中者已略具川人太盛及差除不當等事

一高麗買書之事

是陛下已降之命因衆臣共為之議得旨而後行尋以蘇軾見拒而罷見有文案在尚書省禮部國子監乞取

索看詳

祖宗以來祥符年中賜九經史記兩漢三國志諸子聖惠方等文字天禧年中又賜陰陽地里

等書皆從其請

一黃河軟堰之事亦是陛下已降之命亦因衆

臣共為之議得旨而後行尋以蘇轍見拒而罷見有文

案在尚書省工部都水監乞取索看詳

臣引照尚書省劄子是時蘇轍

偶在式假若從衆臣商議之時轍與其事而於上前自為異說則與許將昔年言除張利一管軍事體一般是亦賣其官長異其同僚况將因轍奏彈遂罷政事轍能責人計亦可以自責也就因轍不與議而人主已行之命其可違而拒之者乎臣聞人君者制命者也人臣者承君之命

而奉行者也命令重則君尊命令輕則臣彊今陛下已

行之命而蘇軾蘇轍違而拒之轍之拒命中外聞之已
驚駭矣軾之拒命不惟中外知之外國亦知之矣異日
敵人生心邊防誤事臣未及議竊惟蘇頌范百祿以摺
留制書及差除不當等事朝廷亦已施行若轍與軾豈
惟斂恩作福朋黨不公而又拒違君命語其情犯又非
頌與百祿之比此而不治命令輕矣臣豈不知川黨之
盛人所難言衆惡見攻禍在不測然臣若更畏避是辜
陛下之任使欲乞檢臣前奏

初十日
留中者

并詳今來所陳事

理斷自宸衷指揮施行前貼黃言奏為蘇軾蘇轍朋黨不公及拒違君命乞令大臣同共體量等事後貼黃言臣謂呂大防必明知此蓋以二聖垂簾之際且務和同豈期軾轍如此狂易乞以臣前後所奏令大防看詳取聖旨如陛下不欲令一宰臣獨當川黨衆人之怨怒則乞指揮下三省樞密院令韓忠彥梁燾鄭雍劉奉世與呂大防同共體量蓋為大臣當議大事故也仍乞早賜施行則天下幸甚

編類章疏係八年三月二十日奏此今因蘇軾辨敦逸初奏不得其時既

附三月末則敦逸此奏却不當先見於二十日故亦附
三月末蘇轍奏辨後五月十六日呂大防言敦逸言轍
應三省同簽文字皆以為轍之罪即指敦逸三月二十
日所奏也敦逸初十日所奏獨檢討未得今實錄但存
黃慶基所奏耳王鈺補錄
亦但存敦逸二十日所奏

欽定四庫全書

續資治通鑑長編卷四百八十三

宋 李燾 撰

哲宗

元祐八年夏四月丁未朔夏國主乾順遣使謝罪獻蘭

州乞賜塞門寨詔答不許

詔答在十四日此事當考詳蘭州未嘗以還夏國今又何

獻也

戊申左朝請郎權發遣湖州張詢就差河東路轉運司

使

政目張詢
河東使

河北東路提點刑獄郭茂恂為戶部郎中

政目二日事六年正月十八日自度外提河北東刑

秘書丞孫朴為工部員外郎

政目二日事七年八月六日為秘丞

中書舍人陳軒為龍圖閣待制知廬

州

政目二日事實錄在十四日

庚戌給事中孔武仲為禮部侍郎

政目四日事三月二十六日初除給事中

實錄十四日自舍人除給事中與政目不同今從政目

翰林侍講學士范祖禹為

翰林學士

政目四日事實錄在三月二十六日

壬子中書舍人喬執中為給事中

政目初六日事實錄在十四日

癸丑降詔恤刑

王稱東都事略詔曰方夏暑時動植之類皆以遂其長養而吾民觸禁抵法繫

縛囹圄其深文之吏或不能體朕欽恤之意因循延蔓久不為決于陰陽之和非細故也其詔天下官司之長敬若時令哀矜庶獄以丕應朕志

甲寅禮部言提點京西南路刑獄孔平仲奏鄧州社稷壇牆垣頽毀壇壝蕪沒並無齋廳亦無門戶令本州增改修建并行下其餘州縣欲乞今後長吏到任須詣社稷春秋祈報自非有故不得委官從之

丁巳詔曰朕聞五帝不相沿樂三王不相襲禮世有損

益因時制宜惟我祖宗嚴奉郊廟當遣官攝事皆考合
於前文唯奠玉親祠自裁成於大禮每以三歲對越二
儀咸秩百神太賚四海迄先帝元豐之末講方丘特祭
之儀蓋將補一代之闕略振百王之墜典朕惟菲德嗣
守丕基列聖已行謹當遵奉先朝未舉懼不克堪是以
昔歲仲冬竭誠大祀神祇享答祖考燕寧前詔有司載
加集議猶欲咨度諸儒之論稽參六藝之文然禮既不
疑則事無可議斷自朕志協於僉言祇率舊章永為成

式今從南郊合祭天地依元祐七年例施行仍罷禮部

集官詳議詔范祖禹所草也

此據新錄政目於五月甲申乃書詔南郊合祭依元

祐七年例丁亥又書詔禮官罷議合祭今兩存之恐新錄考據未詳也二月二十五日蘇軾圍丘六議可考并注范祖禹云云或移注此劉安世云蘇軾議不曾上蓋誤也當是不從軾反復詰難之請因致安世誤云耳安世所云亦未見其詳汪應辰嘗言之

兩浙路轉提點刑獄司申檢會浙

西州縣累經災傷蒙朝廷相繼發米付本路賑濟除接續賑糶過外逐州有見管淮南江西等路發到賑糶不盡米四十餘萬石例各陳次別無支用今欲將其米起

此蠶月鄉民闕食之際各取情願許令人戶赴官請借
每一斗候至向去秋成納新米八升還官仍限四年均
作料次各隨本戶苗稅帶納詔其米許充軍糧外餘
數仰置場減價出糶

戊午御史中丞李之純言臣僚上言乞嚴立制度以絕
奢僭之源杜絕邪侈以成風俗之厚至於閭巷庶人服
錦綺佩珠璣屋室宏麗器用僭越皆可禁止詔令禮部
將見行條貫行下按嘉祐敕猶有品官民庶裝飾真珠

之法至熙寧元祐編敕即行刪去竊以承平日久風俗恬嬉以華麗相高而法禁縱弛至於閭閻下賤莫不僭踰以逞私欲商賈販易獲利日厚則彼方採取其數日增最為殘物害人浮侈踰僭之甚者獨無其法何以示民願降明詔禁廣南東西路人戶採珠止絕官私不得收買外海南諸蕃販真珠至諸路市舶司者抽解一二分入官外其餘賣與民間欲乞如國初之制復行禁權珠具抽解之外盡數中賣入官以備乘輿宮掖之用申

行法禁命婦品官大姓良家許依舊制裝飾者令欲官
買雜戶不得服用以廣好生之德而使民知貴賤之別
莫敢踰僭及民間服用諸般金飾之物浮侈尤甚而條
貫止禁銷金其鏤金貼金之類皆是糜壞至寶僭擬宮
掖往年條禁甚多亦乞修立如銷金之法詔鏤金貼金
之類令禮部檢舉舊條珠子令戶部相度以聞 禮部
言秘書省正字陳祥道狀蒙差兼權太常博士伏覩禮
文有合行改正按貴人賤馬古今所同故覲禮馬在庭

而侯氏升堂致命聘禮亦馬在庭而賓升堂私覲今元
會儀御馬立龍墀之上而特進以下班立於庭是不稱
尊賢才賤馬之意按元會儀車輅皆在庭中御輦御馬
乃在龍墀之上輦馬不相須兼車輅已在庭中今以御
馬在庭儀物別無未稱又王公侍從班在丹墀雖居馬
上而特進以下皆在沙墀而實居馬下若以御馬在庭
以明尊賢賤馬之意於義為允從之

庚申樞密院擬定回夏國主詔省所上表遣使詣闕悔

過上章及獻納蘭州一境地土綏州至義合寨亦取直
畫定却有塞門乞還賜夏國等事具悉朕統御萬邦敦
示大信眷爾嗣藩之始亟馳請命之誠爰給土疆復頒
歲幣豈謂受賜而往輒興犯順之師中外交章神民共
忿朕以爾在位未久勢匪自由姑戢伐罪之大兵聊用
禦邊之中策仍敕疆吏許爾自新今則遣使來庭託辭
悔過何乃謝章之初達遽形畫境之煩言况西蕃故疆
中國舊地已載前詔不係可還其分界雖曾商量在用

兵亦合隔絕然則塞門之請殊非所宜定西以東已有
前諭除河東廊延路新邊界至許從前約令逐路經略
司依前後詔委官開立壕堆外蘭岷路未了地界亦已
令蘭岷路經略司依先降朝旨委官候夏國差到官詳
先降指揮同共商量分畫緣夏國自元祐通貢受賜後
來累次犯邊仍候諸路地界了日可依例別進誓表然
後常貢歲賜並依舊例詔令學士院依此降詔先是中
書侍郎闕尚書左丞梁燾攝事熙州范育請修築事議

不決進呈次燾再爭之曰熙河屢乞修築邊面如努扎聚卜結隆花川隆諾特淺井石門子盡修得為便若先據要隘修之其餘節次可治也今若棄控扼之地而治緩慢處雖多無益徒費國力困邊民生後患也臣聞淺井石門子只可了熙河一路花川應接隆諾特只可了秦鳳一路如努扎去納克密七十里隆諾特去納克密百餘里以其遠應隆諾特不若近接努扎也宜先修努扎納克密次及智固等處如修得努扎其餘未修可也若不修努扎熙河

無出入之路定西遠不可保終成後日之患同列或以
謂先帝知其不可故不修築燾曰臣聞先帝已降旨聚
糧鳩材在通遠軍封樁會先帝上僊不及修築非是難
其為功而不成也先帝要取會州豈有不為此寨范育
計置修築之具皆備只俟得旨可以立就如此即涇原
不須供饋其地膏腴可足兵食况係喀木故地西人必
不敢請若處置得是西人自伏若失措置必須生事昨
西夏理會智固勝如界累年不決及一城定遠羌遂畏

服及進呈夏國詔本燾謂詔內不須指定地界但云一
委帥臣就近從長商量庶使守臣臨機易為處置因進
手疏論臣累與宰相等商量賜夏國詔書所議改易衆
論未合昨因進呈略具面陳邊事之大實在此一詔望
陛下深思遠慮無苟近利必期久遠之安非臣獨見如
此皆中外曉習邊事之人共言其利遂以詔中語言貼
定進入又折簡宰相爭之終不得會燾足疾作是日遂
謁告免權中書省事批出在家主印

范育看詳游師雄
措置進築在七年

二月末此時燾猶未執政也燾執政在六月九日蓋育
議久不決燾執政乃有是言今附八年四月十四日更
須考詳梁燾行狀張舜民作時中書闕官俾公攝事熙
州范育請修築事議不決進呈次公再爭之曰熙河屢
乞修築邊面如努扎聚卜結隆花川隆諾特淺井石門子
盡修得為便若先據要隘修之其餘節次可治也今若
棄控扼之地而治緩慢處雖多無益徒費國力困邊民
生後患也臣聞淺井石門子只可了熙河一路花川應
接隆諾特只可了秦鳳一路如努扎去納克密七十里隆諾特
去納克密百餘里以其遠應隆諾特不若近接努扎也宜先
修努扎納克密次及聚卜結等處如修得努扎其餘未修可
也若不修努扎熙河無出入之路定西遠不可保終成
後日之患同列或以謂先帝知其不可故不修築公曰
臣聞先帝已降旨聚糧鳩材在通遠軍封樁會先帝上
僊不及修築非是難其為功而不成也先帝要取會州
豈肯不為此寨范育計置修築之具皆備只俟得旨可

以立就如此即涇原不須供饋其地膏腴可足兵食況
係智固故地西人必不敢請若處置得是西人自伏若
失措置必須生事昨西夏理會智固勝如界累年不決
及一城定遠羌遂畏服及進呈夏國詔本公謂詔內不
須指定地界但云一委帥臣就近從長商量庶使守臣
臨機易為處置因進手疏論臣累與宰相等商量賜夏
國詔書所議改易衆論未合昨因進呈略具面陳邊事
之大實在此一詔望陛下深思遠慮無苟近利必期久
遠之安非臣獨見如此皆中外曉習邊事之人共言其
利遂以詔中語帖定進入又折簡宰相爭之終不得會
公足疾作四月十五日詣告免權中書省事批出在家
主印時元祐八年也右轄乞退狀云在假五十餘日政
目乞退當

利州路轉運判官陳察為戶部員外郎

政目

在六月半
十四日事實錄無七年八
月十六日為江東運判

甲子資政殿學士通議大夫知永興軍李清臣為吏部

尚書

六年閏八月八日永興召為吏書既而寢之十六日改知真定今復自永興召為吏書五月三日又

改真定政目無此永興軍恐當作成德軍

光祿卿韓宗師權兵部侍郎

政目無此

權禮部侍郎王覲為戶部侍郎

政目無此覲傳云自發運使召權刑侍滿歲為

改戶侍此云權禮侍當考

丁卯四方館使嘉州防禦使李綬致仕

政目二十一日事實錄無之

戊辰禮部言大名府新科明法侯弼等狀竊以先朝立

法廢罷明經及諸科舉人許曾於熙寧五年以前應明

經及諸科舉人依法官例試法為新科明法科自不許
新人取應欲銷盡明經及諸科舊人當日務從朝廷之
意而改應新科者十有七八昨於元祐三年又準朝旨
置籍拘定人數更不許新人取應今來五路却將新科
舉人與進士一例須要就試終場十人已上方許解發
一名顯是立法不均欲乞依諸科例十分中亦留一分
解額解發新科舉人本部勘會存留一分解額有礙條
制如朝廷早要銷盡各人許留一分解額乞自朝廷指

揮詔五路新科明法舉人今後取應人係就試終場者
每實及七人許解發一名如取應終場止有六人已下
亦許解一人

己巳臣僚上言伏見自祖宗以來條制凡官員親戚於
職事有統攝或相干者並回避近時朝廷侍從近臣職
事或有親戚相妨多用特旨更不回避今乃類使叔姪
兄弟更相臨統則是按察之法名存而實廢矣望應今
後内外官職事有親戚相妨並令依法回避更不降特

不回避指揮詔依奏內有服紀遠職事疎臨時取旨

庚午監察御史來之邵言前潁昌府教授鄒浩以媚道

交結蘇頌子弟乃得除太學博士懷其私恩怨望朝廷

詆毀言路伏望屏之遠方詔鄒浩令吏部差充襄州州

學教授

鄒浩怨謗詆毀事當考本傳亦無之陳次升云浩為蘇頌所知故除博士及頌罷浩亦隨罷次

升為御史力乞改正按次升為殿院在紹聖二年十一月今據此改執政事作蘇頌

監察御史

黃慶基言臣僚嘗進劄子乞詔吏部立三法以選擇守

令竊謂此乃當今之急務誠使所任皆得人則不勞而

治矣唐名臣馬周嘗以告太宗曰治天下者以人為本
必欲使百姓安樂在刺史縣令爾縣令既衆不可皆賢
但州得良刺史可矣天下刺史得人陛下端拱巖廊之
上夫復何為茲實確論伏見朝廷差注知州人吏部惟
考歷任資序以為陞遷到部月日以定先後雖間有堂
除或非詳擇至如常調每有擬注奏鈔朝上俞音夕下
授任輕易殊無銓量甚非古者求賢共治之意欲乞應
差知州軍人吏部具合入資序人數錄歷任考課之優

劣舉將之多寡有無勞績有無殿罰畫一申堂中書據其員闕審擇人材量州郡大小地望輕重民事繁簡擬名取旨如此則詮量由於宰執進用出於宸衷於體加重庶幾師帥得人治效可致

壬申詔曰訪聞日近在京軍民難得醫藥令開封府體訪如委是人多病患可措置於太醫局選差醫人就班直軍營坊巷分認地分診治本府差官提舉合藥并日支食錢於御前寄收封樁錢內等第支破患人稀少即

罷

哲宗御集醫治軍民病患詔一道訪聞日近在京軍

民病多有不安難得醫藥令開封府體訪如委是人
多病患可措置於太醫局差醫人就班直軍營坊巷分
認地分看候醫治仍於吏部選差小使臣一十人分頭
管押醫治本府那官提舉所有合藥并官員醫等日支
食錢於御前寄收封樁錢內等第支破候患人稀少即
罷速與施行元祐八

年四月二十六日下

乙亥點檢催放欠員司狀據雍邱縣申淮南郊救應人
戶欠閣稅租并沿納及因災傷借貸錢穀在元祐四年
明堂以前者並特與除放遂具元祐四年秋稅租申乞
除放準省部指揮赦書上言人戶欠閣稅租在元祐四

年明堂以前者並特與除放本縣契勘其元祐四年秋料稅租係在當年九月一日起催當月十四日赦書即是赦前見催欠數本司檢準元祐八年正月十日敕節文應內外諸般欠負並令所屬依赦除放訖關本司點檢當否今來雍邱縣所申事理致依所申尚書省勘會諸路人戶秋稅雖有起催在九月一日緣納畢並在次年正月以後即不係赦前實欠除人戶元祐四年秋料欠閣稅租外餘並依已降赦敕除放

七年十一月二十四日顧臨等看詳

放欠

是月門下侍郎蘇轍奏臣伏見監察御史董敦逸上言
近為川人太盛及差遣不公等因言馮如晦緣翟犀推
勘公事枉陷徒配杖刑人數不少係聖旨下御史臺取
勘更不候事了便除如晦館職知梓州今來前項指揮
乃臣所言之事欲乞朝廷引臣前狀照會施行詳敦逸
所言川人太盛差遣不公指以為言臣以不才過蒙擢
任敦逸若言臣名位過分無補朝廷即是公議今乃言

川人太盛顯是中傷朝廷用人自有資格豈可為臣一人忝預執政遂使川峽四路士人皆裁抑令不得依本資差遣敦逸又言馮如晦差除乃臣言一事以顯敦逸言臣非一並未蒙降出欲乞早賜行下令三省覆實其事若臣稍涉私邪乞正國法若所言無實亦乞辨明免臣被曖昧之讒臣竊見近日宰相已下皆為陛下恭己責成進退臣下少有特出聖斷悉付之衆議動循典法以此每有差除皆須衆人僉議方敢進擬稍有異同即

不敢除惟是近日賈易晁端彥差遣及呂嘉問奏薦恩

澤衆議不允遂有忿爭因此喧傳致被彈劾

賈易去年十月十二

日除京西運副今年二月十八日與蘇州范錫兩易二十七日改徐州晁端彥去年九月六日知蔡州五年五月八日自左司為發運近日差遣謂見呂嘉問去年十一月知襄州未見奏薦事迹

除此之外誰

敢主張親舊過有擢用况馮如晦係東川人臣係西川

鄉里隔遠全非交舊昨來差除蓋衆人謂其昔任御史

推直日能不徇蔡確等意傾陷士人為確所怒因此流

落故有此命臣非不知翟庠公事未了合少遲留只為

翟庠公事元係臣親舅之子程之邵按發如晦以為深仇臣以此須至稍存形迹恐涉黨助之邵裁抑如晦故不敢異議方以周防畏避為愧不知敦逸反謂臣曲庇如晦事屬誣罔臣備位要近誠不欲與小臣計較是非但恐讒口浸漬漸不可長伏望聖慈早賜施行

此據王鉉元祐

八年補錄乃四月事今附月末敦逸并輟三月末已有奏章

欽定四庫全書

續資治通鑑長編卷四百八十四

宋 李燾 撰

哲宗

元祐八年五月丁丑朔

戊寅監察御史黃慶基言朝廷仁愛斯民拯患恤災使無失所之歎者在加意於賑濟故比歲淮甸旱倉廩不足以給民至以上供綱運米調之前年浙西水本路歲

計不足至使江西湖北運米以濟之所費無慮數百萬然而不惜重費以濟一時不若修舉良法以垂惠於萬世蓋義倉者良法也始自隋長孫平建議曰古者三年耕有一年之積九年作有三年之儲雖有水旱人無菜色皆由勸導有方蓄積先備故歷世行之以為利焉元豐間先帝復行其法以為隋唐取於民太重慮民不堪其求於是納苗米一石者輸義倉米五升可謂至薄矣夫樂歲粒米狼戾雖多取之不為虐又况納苗米一石

止輸五升固非重斂也蓄積稍豐或有水旱則所至倉廩自足以濟民矣臣去歲道過太平州見饑民甚衆而無流亡溝壑者蓋猶有當日義倉所積之米足以賑濟故也又聞蘇湖之民雖蒙朝廷運米以濟之然饑者朝不及夕往往不得霑上之惠而殍踣者多矣乃知義倉誠天下之良法今其條制具在望自今歲復行詔令戶

部詳度

知越州蔡卞知潤州

卞及服古並政目二日事

知廬州朱

服知壽州

服知廬州在六年八月十六日

秘書少監王古兼國子祭酒

已卯新除吏部尚書李清臣為資政殿學士知真定府
以權給事中姚勔論清臣不當召用故也

政目無此六月十八日又

召

庚辰承議郎簽書潁州節度判官事趙令時為光祿寺

丞

政目五月四日事黃慶基云在十五日

辛巳王崇極為引進使

政目初五日事當考

癸未蘇軾同呂希哲吳安詩豐稷趙彥若范祖禹顧臨

上言臣等猥以空疎備員講讀聖明天縱學問日新臣

等才有限而道無窮心欲言而口不逮以此自愧莫知
所為竊謂人臣之納忠譬如醫者之用藥藥雖進於醫
手方多傳於古人若已經效於世間不必皆從於已出
伏見唐宰相陸贄才本王佐學為帝師論深切於事情
言不離於道德智如子房而文則過辯如賈誼而術不
疎上以格君心之非下以通天下之志但其不幸仕不
遇時德宗以苛刻為能而贄諫之以忠厚德宗以猜疑
為術而贄勸之以推誠德宗好用兵而贄以消兵為先

德宗好聚財而贄以散財為急至於用人聽言之法治
邊馭將之方罪已以收人心改過以應天道去小人以
除民患惜名器以待有功如此之流未易悉數可謂進
苦口之藥石鍼害身之膏肓使德宗盡用其言則貞觀
可得而復臣等每退自西閣即私相告言以陛下聖明
必喜贊議論但使聖賢之相契即如臣主之同時昔馮
唐論頗牧之賢則漢文為之太息魏相條晁董之對則
孝宣以致中興若陛下能自得師莫若近取諸贊夫六

經三史諸子百家非無可觀皆足為治但聖言幽遠末
學支離譬如山海之崇深難以一二而推擇如贅之論
開卷了然聚古今之精英實治亂之龜鑑臣等欲取其
奏議稍加校正繕寫進呈願陛下置之坐隅如見贅面
反覆熟讀如與贅言必能發聖性之高明成治功於歲
月臣等不勝區區之意

甲申尚書左丞梁燾表稱疾病乞守藩詔不允燾再請
補外詔斷來章及與寬假將治

御集在
十六日

詔南郊合祭

依元祐七年例

政月八日事合取四月丁巳詔詳考之今姑兩存

左宣德郎

蔡肇校勘黃本

明年六月十三日出

御史中丞李之純復中大

夫國子司業趙挺之為京東路轉運副使

十五日黃慶基云云

司

封員外郎丁隲知宿州

七年十月二十日為封外

駕部員外郎胡

宗炎提點京西刑獄比部郎中孫亞夫為兩浙轉運副

使

自蔡肇至孫亞夫皆從政月惟亞夫實錄有之

乙酉翰林學士兼侍講范祖禹言近令講讀官同將漢

唐正史內可以進讀事跡進呈按講筵故事講官講經

讀官讀史若令同進讀漢唐史書即是講官兼讀官之職乞專令讀官鈔節進讀從之

丁亥詔禮官罷議合祭

政目十一日事合取四月丁巳詔詳考之今始兩存

罷

廣南東西路鑄折二錢

實錄十一日事政目乃無此

己丑錄京畿囚

政目十一日事

辛卯監察御史董敦逸黃慶基皆罷敦逸為荆湖北路

轉運判官慶基為福建路轉運判官坐言尚書右丞蘇

轍禮部尚書蘇軾不當也

新錄既於十五日載二人罷御史除運判且略載呂大防

蘇轍對上語矣十六日又詳載之顯是重複今削去略語但存二人除目政目二人除運判在初四日

壬辰三省同進呈董敦逸四狀言蘇轍黃慶基三狀言蘇軾呂大防奏曰敦逸言轍應三省同簽文字皆以為轍之罪慶基言軾曰法者天下之平也雖天子之尊不敢以喜怒而輕重況於人臣乎為人臣者苟欲廢法以私恣喜怒則上竊國柄下貽民患其禍非小也按禮部尚書蘇軾天資凶險不顧義理言偽而辨行僻而堅故名足以惑衆智足以飾非所謂小人之雄而君子之賊

者也陛下擢之於罪廢之中寘之於侍從之列出守大藩固宜奉法循理而乃專以喜怒之私輕廢朝廷之制昨知潁州日違法令都廳置簿拘收賞錢不依條例妄行費用及失入丁真配罪見係京西路提刑司按發取勘干繫官吏軾已移楊州又入為兵部尚書矣乃敢薦越申陳致朝廷徇其所請將監司按發公事指揮不得取勘致令遷延該赦考軾之意特欲姑息小人蓋庇舊吏以沮壞法令而已軾前知杭州日有百姓顏益顏章

以受納官不肯領綽率衆人論訴非有大過也軾不遵
法令判令刺配雖嘗自劾蒙朝廷放罪而軾之所喜雖
監同按發公事乃妄陳橫議令不得取勘軾之所怒雖
所犯止於杖罪乃判令刺配此何道也書曰惟辟作福
惟辟作威臣有作福作威害于而家凶于而國蓋言威
福之柄惟人君可以專之也軾為人臣乃欲恣喜怒而
出入人罪原其不遵法令之意蓋有輕蔑朝廷之心其
不忠之罪大矣軾自進用以來援引黨與分布權要附

麗者力與薦揚違迂者公行排斥昨薦王鞏既除宗正
寺丞又通判楊州竟以不持行檢敗近者薦林豫自東
排岸不問資序遂差知通利軍前者除張耒為著作郎

六年十二月
二十四日

近者除晁補之為著作佐郎

七年十月
二十六日

皆

軾力為援引遂至於此至如秦觀亦軾之門人也素號
猥薄昨除秘書省正字既用言者罷矣猶不失為校對
黃本書籍是以奔競之士趨走其門者如市惟知有軾
而不知有朝廷也為人臣而招權植黨至於如此其患

豈小哉近者高麗人使乞賜書籍此乃祖宗朝故事且屢嘗賜書與之矣軾乃拒違詔旨極言不可及都省批送禮部令吏人上簿因非重責也軾乃蓋庇吏人力陳強辨期必勝而後止夫都省總領六曹自有上下之分豈有論事不當尚敢力爭原其凌轢都省之意乃有輕視朝廷之心其不忠之罪又可見矣軾在先朝恣為歌詩謗訕朝政有司推治實迹具存衆皆以為罪在必死獨先帝憐之止從輕典送黃州安置先帝之於軾可謂

有再造之恩矣。雖天地父母無以過之。軾不能感戴厚恩。而乃內懷怨望。二聖陛下臨御之初。以軾為中書舍人。軾因行制誥。公然指斥先帝時事。略無忌憚。傳播四方。士大夫讀之。有識者為之痛心。有志者為之扼腕。考軾之意。特欲刺譏先帝。以摅平昔之憤。爾軾行李之純。除河北都轉運使。誥云。乃者役錢貸息之敝。民兵馬政之勞。萃於北方。又云。河湓為災。老幼奔走流離。道路十年於此矣。嗚呼。其孰能為朕勞來安集。使復其舊乎。夫

宣王承厲王之後萬民離散不安其居而能勞來安集之故見於鴻鴈之詩先帝時北方安得有老幼奔走流離道路之事謂緣役錢貸息民兵馬政以致天災必待陛下然後能遣使以勞來安集是以先帝方何代乎乃以厲王之亂相擬也軾行蘇頌除刑部尚書誥云乃者法病於煩官失其守盜賊多有獄市紛然夫先帝明慎用刑哀矜庶獄始復大理寺刑部詳定及三省點檢獄案之制安得法病於煩官失其守至於盜賊多有獄市

紛然惟漢武帝時暴征遠戍於是盜賊競起至遣直指
之使以督捕之此乃可謂紛擾先帝時何嘗聞有此也
軾為此言是以先帝方何代乎乃以武帝之暴相擬也
軾行劉誼知韶州誥云爾昔為使者親見民病盡言而
不諱阨窮而不憫安知有今日之報乎夫劉誼得罪於
先帝自以職在奉行法度有所不至當公論之而乃張
皇上書用此罷江西提舉安得為盡言乎至於安知有
今日之報此語尤不忍聞陛下奉祫宗廟當有以顯揚

先帝之鴻業休德豈欲報先帝得罪之人乎軾行唐義
問除河北轉運使誥云朕修賦役之法黜聚斂之吏去
薄從忠務以養民夫先帝立法豈不欲養民邪先帝用
人豈不欲去刻薄而從忠厚邪今以為務以養民是指
先帝之不能養民也今以為黜聚斂之吏是指先帝用
聚斂之吏也軾行貶呂惠卿誥云苟有蠹國以害民率
皆攘臂而稱首夫先帝立法乃欲與天下同利豈有先
帝之聖神英睿冠絕百王如此而乃肯從蠹國害民之

謀乎軾所行制誥皆在舍人院願陛下試取而觀之蓋
有聲述不盡者臣請以常人論之對人之子詈人之父
猶且義不勝誅況軾職代王言而實詆先帝按之以法
當如何哉陛下奉承先帝之宗廟歲時薦享未嘗不懷
怵惕霜露之感今乃使譏刺先帝之人列於侍從實在
朝廷臣恐先帝之威靈在天亦當垂憤怒也使軾當今
日得保首領已為幸矣今乃驟遷之亟用之唯恐不及
臣恐天下之人亦有以議陛下也昔楊惲以田彼南山

蕪穢不治之語譏刺漢朝宣帝尚戮於市竊以譏刺朝廷其罪小至於譏刺宗廟則其惡不可容矣陛下以軾為有大功而不敢治則軾自擢用以來未聞有毫髮之功也以軾為有厚德而不可貶則軾之行已貪污積惡靡所不有至如結託常州宜興知縣李去盈強買姓曹人抵當田產致其人上下論訴進狀者凡八年方與斷還其穢惡之迹則未敢上瀆聖聰不可謂有德者也自軾進用人望其改過自新而乃恣為喜怒自擅威福援

引朋黨紊亂紀綱公行制誥指斥先朝原其不敬宗廟之意乃有輕視陛下之心然而累年於茲人不敢言者以輟身為執政朋黨親戚布在要路權勢熏灼內外能立致人於禍患故畏憚而不敢言爾臣雖至愚非不知言發則禍至然而義激於中不能自止故力為陛下言之望賜英斷上以釋先帝之謗議次以正今日之典刑仍令中書省削去軾所行詰辭言涉刺譏者以示人臣大不恭之戒又言曰治天下者必先於正朝廷正朝廷

必先於破朋黨自非明足以察微公足以兼聽睿足以
獨斷者未有不為姦邪所蔽也當有唐之世王叔文韋
執誼柳宗元之徒結為朋黨瀆亂紀綱一時名士莫不
歸之幾壞天下賴憲宗剛明立行斥逐故小人不得以
行其志文宗時牛僧孺李宗閔楊虞卿之徒更相傅會
上則蔽人君之耳目下則擅朝廷之權柄文宗至臨朝
興歎然終不能去也觀憲宗之所以治文宗之所以亂
可為治世之鑒戒矣不謂今日親見此蔽臣近言禮部

尚書蘇軾已歷疏其所為矣竊見門下侍郎蘇轍懷邪
徇私援引黨與怙勢曲法務與其兄相為肘腋以紊亂
朝政軾則外許人差遣而公薦之轍則內為之應而引
用之附會者立與進用違忤者公行排斥上不畏國法
下不顧公義臣請疏其顯然之迹按軾與呂陶交結至
厚昨者薦陶自代遂除為起居舍人近日中書舍人陳
軒緣館伴高麗人使請賜書籍事軾惡軒之不附已也
遂公奏於朝力加排詆意欲使軒補外乃遷陶為中書

舍人

陶遷中書舍人
在後六月八日

夫詞掖近臣乃陛下之侍從軾猶

敢公然排斥不附己之人而陰欲進其黨與其擅威福

之罪大矣軾知潁州日趙令時為本州簽判軾與之往

還甚密每赴趙令時筵會則坐於堂上入於卧內惟兩

分而已其家婦女列侍左右士論極以為醜軾乃公薦

於朝稱其才美訪聞蘇轍見議除令時差遣其肆欺罔

之罪大矣

五月四日令
時光祿丞

國子司業趙挺之為御史日屢

言軾不公事迹軾居禮部統轄國子監日務擴撫太學

中事凡所判狀多不依學制意欲沮抑挺之使之補外
訪聞蘇轍見議除挺之為轉運副使以同列商議未合
故未敢進呈其挾私怨而忘公義乃至於此太府寺丞
文勛以篆字游於軾之門初不以公正吏才稱也軾既
援引轍遂除為福建路轉運判官在正月十九日夫監司按察
一路寄委不輕豈可以非才而授其職徇私情而棄國
法乃至於此馮如晦為夔州路轉運使日按發公事不
當見係御史臺推治未結絕間轍以川人遂除館職差

知梓州近斷敕方下如晦雖以法奪官而差遣與職竟不動也可謂循法人乎其恣橫乃至於此趙高帥廊延日欲棄熙河而不敢獻議乃以書抵大臣是時轍為中丞得其書即為論列賴諫官劉唐老疏其交通誣罔之迹謀遂不行陛下雖不加罪而亦略無愧恥欺罔乃至於此前日臣嘗言執政不務協和凡欲行一事除一差遣商量累日多不能合甚者幾於忿爭極傷國體蓋轍欲進其黨與故衆論不肯相從爾士大夫不顧節義

而競相結託以希進身者由大臣倡率之也臣愚不知大臣之交結黨與其意何所為也方今侍從之間為其黨者十有四五矣省寺之間為其黨者十有六七矣館閣之間為其黨者十有八九矣其餘陰相傳會者不可一二言也軾嘗自言陛下稱其兄弟孤立以為必不疑也是以敢交結黨與而無所忌憚又其黨言陛下許軾大用以為必見信也是以士大夫莫不爭趨其門以圖進取上下唱和合為一黨牢不可破浸淫日久臣恐其

權勢愈甚朋黨愈多則為國家之患良未已也陛下可不深慮耶且人臣事君惟有忠爾一言涉於欺罔則終身不可以誠信委之按轍薦王鞏累數百言陛下真以為可用也既而淮南提點刑獄鍾浚根究王鞏在任日穢惡狼籍實迹具存遂謫為監當而轍亦怡然自若略不引咎程之邵轍之表弟也昨任夔州路轉運判官按知雲安軍孫拱事拱與之邵互論見係推治未見曲直乃除之邵為都大提舉茶事

六年十二月六日除之邵

且事在有司

當原情定罪豈可以親戚之故乃驟移差遣更獲美遷
且為人臣者不當有己豈有兄之所喜則立加進用兄
之所怒則陰為排斥忘盡忠體國之誠而用招權徇私
之志不加斥免何以控御臣下至如軾之罪惡其最大
而不可容者乃忘先帝保全之恩忽陛下擢用之意因
行制誥公肆刺譏以法論之指斥乘輿罪在不赦而况
指斥宗廟乎雖陛下仁聖欲示兼容然而軾之情理不
順其如國法何其如公議何此固人神之所共惡也揚

雄曰天地無不容也不容於天地者其惟不仁不義乎
陛下試考軾轍所為可謂不仁不義者矣是安可容邪
孔子曰惡居下流而訕上者蓋以其輕肆語言不知忌
憚則無所不為故可惡也陛下試觀軾轍所為稍失控
御則何所不至蓋既敢訕謗則是懷無上之心矣自古
奸臣未見此比惟其權勢熏灼內外故士大夫各懷顧
望不敢盡言於是呂大防蘇轍等奏曰慶基言軾所撰
李之純等六人誥文涉譏毀先帝其間陸師閔誥一道

係范百祿詞非軾所撰臣竊觀先帝聖意本欲富國彊
兵以鞭撻四方而一時羣臣將順太過故事或失當及
太皇太后與皇帝臨御因民所欲隨事救改蓋事理然
耳昔漢武帝好用兵重斂傷民昭帝嗣位博采衆議多
行寢罷明帝尚察屢興慘獄章帝改之以寬厚並當時
天下悅服未有以為謗毀先帝者也至於本朝真宗即
位弛逋欠以厚民財仁宗即位罷修宮觀以息民力凡
此皆因時施宜以補助先朝闕政亦未聞當時士大夫

有以為毀謗先朝者也近日元祐以來言事官有所彈擊多以毀謗先帝為詞非唯中傷士人兼欲搖動朝廷意極不善若不禁止久遠不便蘇轍又奏曰臣昨日取兄軾所撰呂惠卿誥觀之其言及先帝者有曰始以帝堯之仁姑試伯鯨終焉孔子之聖不信宰予兄軾亦豈是譏毀先帝者耶臣聞先帝末年亦自深悔已行之事但未暇改耳元祐初改正追述先帝美意而已太皇太后曰先帝追悔往事至於泣下當時大臣數人其間極

有不善不肯諫止呂大防曰聞永樂敗後先帝嘗曰兩
府大臣略無一人能相勸諫然則一時過舉非先帝本
意明矣太皇太后曰此事皇帝宜深知大防曰皇帝聖
明必能照察此事於是得旨敦逸慶基並與知軍差遣
大防轍等云云新錄並掇龍川畧志但不載與二人知
軍差遣今並增入敦逸慶基除運判政目於初四日書
其事

甲午戶部言左班殿直趙叔嶢自陳係祖免親為父亡
解官持服乞比附宗室換官體例支給請受按宗室小

使臣丁憂並不許解官所以不罷俸給今若依外官丁憂例更不支給俸錢慮或失所欲乞應宗室任小使臣丁憂父祖俱亡者祖免親許給俸非祖免親許給半俸從之 權戶部尚書錢總為龍圖閣直學士知開封府

總權戶部尚書錢總為龍圖閣直學士知開封府韓宗道為戶部侍郎

六年十二月以戶部尚書錢總為兵部尚書侍郎

十八日寶錄龍圖閣待制知陝州王震知永興軍

日寶錄集賢院學士知河中府李周知陝州

政目五月十八日工

部員外郎孫朴為司封員外郎

政目五月十八日
四月初二日工外

乙未尚書左丞梁燾奏乞便郡養疾詔不允

丙申左朝請郎新荆湖北路轉運判官董敦逸知臨江

軍左朝請郎新福建路轉運判官黃慶基知南康軍敦

逸慶基既有旨與知軍差遣而御史中丞李之純及侍

御史楊畏監察御史來之邵亦言二人誣陷忠良朝廷

容貸止令出使臣恐後人觀望得任私意敢肆狂誣故

遽責之

據蘇轍龍川畧志進呈二人疏日已有旨與知
軍差遣不緣御史章也李之純等時亦有言耳

今據略志稍加刪修紹聖元年四月乙巳當參考

戊戌校書郎陳師錫為工部員外郎集賢校理著作佐

郎時彥為兵部員外郎集賢校理

政目二十二日實錄無

朝奉郎

常安民為開封府推官

政目二十八日三年五月八日安民自太博為丞四年二月二

日為江
西運判

太僕寺丞劉當時為河北轉運判官

政目二十日

己亥皇弟武成節度使祁國公偁加開府儀同三司

政目

在二十
六日

黃慶基董敦逸既責蘇軾以劄子自辨曰臣

自少年從仕以來以剛褊疾惡盡言孤立為累朝人主

所知然亦以此見疾於羣小其來久矣自熙寧元豐間
為李定舒亶輩所讒及元祐以來朱光庭趙挺之賈易
之流皆以誹謗之罪誣臣前後相傳專用此術朝廷上
下所共明知然小人非此無以深入臣罪故其計須至
出此今者又聞臺官黃慶基復祖述李定朱光庭賈易
等舊說亦以此誣臣并言臣有妄用潁州官錢失入丁
真死罪及強買姓曹人田等雖知朝廷已察其姦罷黜
其人矣然其間有關臣子之大節者於義不可不辨臣

先任中書舍人日適值朝廷竄逐大姦數人所行誥詞
皆是元降詞頭所述罪狀非臣私意所敢增損內呂惠
卿自前執政責授散官安置誅罰至重當時蒙朝旨節
錄臺諫所言惠卿罪惡降下既是詞頭所有則臣安敢
減落然臣子之意以為事涉先朝不無所忌故特於誥
詞內分別解說令天下曉然知是惠卿之姦而非先朝
盛德之累至於竄逐之意則已見於先朝其畧曰先皇
帝求賢若不及從善如轉圜始以帝堯之仁姑試伯鯀

終焉孔子之聖不信宰予發其宿姦謫之輔郡尚疑改過稍畀重權復陳罔上之言繼有礪山之貶反覆教戒惡心不悛躁輕矯誣德音猶在臣之愚意以為古今如鯨為堯之大臣而不害堯之仁宰予為孔子之高弟而不害孔子之聖又況再加貶黜深惡其人皆先朝本意則臣區區之忠蓋自謂無負矣今慶基乃反指為誹謗指斥不亦矯誣之甚乎其餘所言李之純蘇頌劉誼唐義問等詰詞皆是慶基文致附會以成臣罪只如其間

有勞來安集四字便云是厲王之亂若一一似此羅織人言則天下之人更不敢開口動筆矣孔子作孝經曰如臨深淵如履薄冰此幽王之詩也不知孔子誹謗指斥何人乎此風萌於朱光庭盛於趙挺之而極於賈易今慶基復宗師之臣恐陰中之害漸不可長非獨為臣而言也又慶基所言臣行陸師閔誥詞云侵漁百端怨讟四作亦謂之謗訕指斥此詞元不是臣行中書案底必自有主名可以覆驗顯是當時掌誥之臣凡有竄逐

之人皆似此罪狀其事非獨臣也所謂侵漁怨讟者意亦指言師閔而已何名為謗訕指斥乎慶基以他人之詞移為臣罪其欺罔類皆如此又慶基所言臣妄用潁州官錢此事見蒙尚書省勘會次然所用皆是法外支賞令人告捕強惡賊人及逐急將還前知州任內公使庫所少貧下行入錢物情理如此皆可覆驗又慶基所言臣強買常州宜興縣姓曹人田地八年州縣方與斷還此事元係臣任團練副使日罪廢之中託親戚投狀

依條買得姓曹人一契田地後來姓曹人却來臣處昏
賴爭奪臣即時牒本路轉運司令依公盡理根勘仍便
具狀申尚書省後來轉運司差官勘得姓曹人招服非
理昏賴依法決訖其田依舊合是臣為主牒臣照會臣
愍見小人無知意在得財臣既備位侍從不欲與之計
較曲直故於招服斷遣之後却許姓曹人將元價抽收
仍亦申尚書省及牒本路施行今慶基乃言是本路斷
遣本人顯是誣罔今來公案見在戶部可以取索案驗

又慶基所言臣在潁州失入丁真死罪此事已經刑部
定奪不是失入却是提刑蔣之翰妄有按舉公案具在
刑部臣竊料慶基所以誣臣者非一臣既不能盡知又
今來朝廷已知其姦妄而罷黜其人臣不當一一辨論
但人臣之義以名節為重須至上煩天聽也太皇太后
令輟諭軾曰緣近來衆人正相攬拾且須省事軾乃具
劄子稱謝曰天慈深厚如訓子孫委曲保全如愛支體
感恩之涕不覺自零伏念臣才短數竒性疎少慮半生

犯患垂老困讒非二聖之深知雖百死而何贖伏見東漢孔融才疎意廣負氣不屈是以遭路粹之寃西晉嵇康才多識寡好善闇人是以遇鍾會之禍當時為之扼腕千古為之涕流臣本無二子之長而兼有昔人之短若非陛下至公而行之以恕至仁而照之以明察消長之往來辨利害於疑似則臣已下從二子游久矣豈復有今日哉謹當奉以周旋不敢失墜便須刻骨豈獨書紳庶金螭蟻之軀以報邱山之德

癸卯禮部尚書蘇軾言臣伏見元祐貢舉敕諸詩賦論
題於子史書出如於經書出而不犯見試舉人所治之
經者聽臣今相度欲乞詩賦題許於九經孝經論語子
史并九經論語注中雜出更不避見試舉人所治之經
但須於所給印紙題目下備錄上下全文并註疏不得
漏落則本經與非本經舉人所記均一更無可避兼足
以示朝廷待士之意本只以工拙為去取不以不全之
文掩其所不知以為進退於忠厚之風不為無補詔依

奏今來一次科場未得出制度題目 龍圖閣直學士

知成都府蔡京請便郡詔不允

甲辰秘閣校理余中為著作佐郎

政目二十八日二月十六日除秘閣校理

侍御史楊畏言伏覩近降指揮令兩省各舉臺官兩

員者風憲之任治忽所繫人主耳目所寄之地可謂重

矣未聞令宰相屬官舉御史御史與宰執最為相關之

地執政已不自差而使其屬舉之其異於自差無幾矣

詔前降兩省舉臺官指揮更不施行

王銍元祐八年補錄五月事附見月

未當
考

六月戊申建武軍節度使駙馬都尉李瑋卒上奠哭之

贈開府儀同三司

贈開府政目十八日事今附此

庚戌太妃門客充彥章補假承務郎

政目四日事明年三月七日當考

陝西轉運使判官張景先陞為副使

政目四日事來之邵云云在七

月二
日

辛亥禮部言檢準元祐五年二月十六日勅勘會科場

新兼詩賦慮諸路闕詩賦試官其通判內有可差之人

亦許差充又元祐五年三月十九日禮部狀準條諸州應舉不滿百人轉運司預相度指近便州併試欲諸州應舉不滿一百五十人者權依上條併試從之

甲寅起居郎兼權給事中姚勔起居舍人呂陶並為中

書舍人

五月十六日黃慶基言可考政目同

秘書少監王古為起居郎

政目

初八日

秘書丞呂希純為起居舍人

政目初八日

監察御史來

之邵為殿中侍御史

政目初八日

知潤州集賢校理崔公度

為秘書少監公度辭不至加直龍圖閣仍知潤州

公度先以

集校知潤州在六年閏八月六日政目初八日公度秘少實錄無之紹聖二年十一月六日乃以新除秘少知宣州按公度傳知潤州以起居郎召辭章再上七年正月二十六日復知潤州未滿歲除秘書少監辭如初除直龍圖閣仍知潤州召赴闕復辭紹聖二年再除秘書少監又力辭得知宣州據公度傳除直龍圖閣不見的月日今右朝奉郎司農少寺丞秦定為江南東路轉運附此

判官

政目初八日實錄在二十一日

王荃冲照處士

政目初八日書王荃冲照處士

其事當考
荃何人

禮部尚書蘇軾乞知越州詔不允

戊午中大夫守尚書左丞梁燾充資政殿學士同醴泉觀使先是燾以疾求罷有詔與在京宮觀使宰相奏以

故事非宰相不除使遂置同使之名以寵之

七月八日知潁昌梁

燾罷政必有因緣而實錄但稱以疾新舊傳皆然邵伯溫作楊畏傳云畏寄聲章惇云以蘇呂勢逐劉摯梁燾則燾亦必被彈射也當考政目同觀使亦係十二日元祐六年正月馮京已除中太一宮使京亦未嘗為宰相也不知燾傳何以云然當考燾初以議邊事不合即屬疾求罷章累

上皆遣內侍封還仍問所以必去之理并密訪人材燾曰信任不篤言不見聽而詢人材之可用者非臣敢當也使者再至乃具手奏謂人材可大任者聖主當自知之但須識別邪正公天下之善惡使官家左右前後皆

得正人則天下受福宗社有慶矣陛下必欲知可大用
之人無過於圖任舊人中堅正純厚有人望者不牽左
右好惡之言以移聖意天下幸甚既授資政殿學士同
醴泉觀使又四上章求補外出知潁昌臨行遣內侍賜
茶藥宣諭曰已用卿言復相范純仁矣

出知潁昌在七月八日此據梁

燾行狀刪修其信否當考梁燾行狀張舜民作公力陳疾自佚懼廢國事雖曲示優眷義非敢安章三入遣內侍封還公又力辭之先是公論邊事不決預以書篋衣囊寄置別舍翌日空府第遷觀音佛祠引去表再上詔不允仍斷來章賜以優告公意謂大臣議論多不得行何以補報決以得請為期章累拜不已上連遣近璫相

繼至第封還劄子問所以必去之理及令密訪人材公曰信任不篤言不見聽而詢問人材之可用者非臣敢當也使者再至即為手奏謂人材可大任者聖主當自知之但須識別邪正公天下之善惡使官家左右前後皆得正人則天下受福宗社有慶矣陛下必欲知可大用之人無過于圖任舊人中堅正純厚有人望者不牽左右好惡之言以移聖意天下幸甚而公請愈堅又明日宣仁諭宰相許解機政令與在京宮使故事非宰相不除使遂置同使之名以資政殿學士同醴泉觀使公辭特置使名恩禮優重官制以來未有前比臣不敢當願得便郡以就安養兩宮遣近臣宣諭曰官家不欲卿去方且大用公但感激恩遇而已尋復疏陳前所言力辭同醴泉觀使章四入改知潁昌府充京西北路安撫使以疾免謝辭出都之日上命中貴人賜茶藥宣諭已用卿言用舊人復相范純仁候知卿安即召矣

手札賜呂大防曰見任執政

官闕員稍多今欲先除右僕射一員若以見任人遞遷
除授又慮中外人情不與必致議論紛紜今思之不若
且於舊人中圖任欲除范純仁作右僕射不知如何或
得穩當且先遣一御藥院官齋詔書召赴闕然後降麻
大防奏進用大臣非臣所敢僭預如所宣示實允羣議
已未遣勾當御藥院李倬齋詔書賜觀文殿大學士太
中大夫知潁昌府范純仁令乘驛赴闕先是侍御史楊
畏言外議以蘇頌初罷恐必用尚書右丞同知樞密院

事二人而已一則天資褊狹非有疎通濟務之材且徇
己強懷未必無懷恩報怨之意一則器業節操材望之
類一切未見可取只緣聯姻近戚而處本兵中外已籍
籍不平況任宰相乎

右丞鄭雍同知樞密院韓忠彥

於是聞將以純仁

為右僕射畏又言治天下者賞罰號令而況宰相佐人
君出賞罰號令以示至公哉純仁去歲帥太原府守邊
無狀上下失備西賊乘之犯麟州蹂踐千里死者數萬
人方罷帥降官名在謫籍而陛下遽命以為相是賞罰

不正而功罪未判也以為功則罪籍未除以為罪則未
應除召況為相哉陛下命相而賞罰未明何以昭示天
下哉自是七疏皆不聽監察御史來之邵又言純仁師
事程頤闇狠不才於國無補及純仁至畏又言純仁自
潁昌府被召未入見而張蓋過內門為不恭太皇太后
皆不聽此據王銍元祐八年補錄增入銍又云太皇太
后覺言者觀望呂大防蘇轍意屢攻罷宰相執
政以純仁舊德故召用待至國門始下制畏與之邵俱
論純仁不當為宰相當時皆謂畏等陰受風旨非公論
也銍所云蓋與邵伯溫畧同須更考詳或曰畏與蘇軾轍俱蜀人前擊劉

摯後擊蘇頌皆陰為轍地太皇太后覺畏私意故復自

外召用純仁畏尋又言轍不可大用云

此據邵伯溫辨誣畏為轍地恐

未必然已見六年十月十八日并二十八日當與王鉅所錄并考政目召范純仁係十二日或改己未十三日

作是日

戊午

辛酉資政殿大學士右光祿大夫知揚州張璪卒贈右

金紫光祿大夫賜絹五百疋謚簡翼

此據王存墓誌新錄闕璪傳緣舊錄

闕卷故也王鉅補傳亦當別修政目於二十八日書贈璪金紫於七月十二日書賜絹五百疋璪墓誌王存作

雜錄第一
冊有之

壬戌門下中書後省言準朝旨編修在京通用條貫取到在京諸司條件修為一書除係海行一路一州一縣及省曹寺監庫務法皆析出關送所屬內一時指揮不可為永法者且合存留依舊外共修成勅令格式若干冊所有元祐三年十月終以前條貫已經刪修收藏者更不施行其十一月一日以後續降自為後勅及雖在上件月日以前若不經本省去取并已行關送者並合依舊施行仍乞隨勅令格式名冠以元祐為名從之

端明殿學士兼翰林侍讀學士禮部尚書蘇軾言臣伏見元祐五年秋頒條貫諸民庶之家祖父母父母老疾無人供侍子孫居喪者聽尊長自陳驗實婚娶伏以人子居父母喪不得嫁娶人倫之正王道之本也孟子論禮色之輕重不以所重徇所輕喪三年二十五月使嫁娶有二十五月之遲此色之輕者也釋喪而婚會鄰於禽犢此禮之重者也先王之政亦有適時從宜者矣然不立居喪嫁娶之法者所害大也近世始立女居父母

及夫喪而貧乏不能自存並聽百日外嫁娶之法既已
害禮傷教矣然猶或可以從權而冒行者以女弱不能
自立恐有流落不虞之患也今又使男子為之此何義
也哉男年至於可娶雖無兼侍亦足以養父母矣今使
之釋喪而婚會是直使民以色廢禮耳豈不過矣哉春
秋記經禮之變必曰自某人始使秉直筆者書曰男子
居父母喪得娶妻自元祐始豈不為當世之病乎臣謹
按此法本因邛州官吏妄有起請當時法官有失考論

便為立法臣備位秩宗前日又因邇英進讀論及此事不敢不奏伏望聖慈特降指揮削去上條稍正禮俗癸亥詔從軾請

甲子資政殿學士知真定府李清臣為戶部尚書

政目六月

十八日實錄在八月二十五日復召清臣必有議論但未見記錄者當考求追附

資政殿學士

同醴泉觀使梁燾知潁昌府

此據政目燾與劉安世同出實錄在七月癸未今不

取實文閣待制樞密都承旨劉安世知真定府

政目六月十八

日實錄在八月二十七日今從政目韓瓘云云當附注八月二十七日

提點河東路刑獄

畢仲游為職方員外郎

政目

乙丑左宣德郎秘書省校對黃本秦觀為正字

政目十九日實

錄在七月

二十四日

丙寅刑部言修立到司門條內陳請廢置移復城門關
津橋道並申刑部及部送官物出入畫時具部送人姓
名申所屬寺監及尚書本部從之

戊辰詔諸元無縣學處輒創及舊學舍損壞許令人戶
出備錢物修整者各杖一百以尚書省言外路多違法

科率造學故也

權工部侍郎王欽臣權吏部侍郎

政目

二十日都水監丞魯君貺為水部員外郎

政目二十日

秘閣校

理徐王府記室龔原為兩浙轉運判官

政目二十日

辛未吏部言應轉運提刑司依敕奏到知州縣令在任

政迹優異者乞與升名次從之

壬申禮部尚書端明殿學士翰林侍讀學士左朝散郎

蘇軾知定州

按蘇軾奏議八月十九日以端明侍讀禮書論讀漢唐正史則六月二十六日不應

已除定又實錄於九月十三日再書除定州恐六月二十六日所書或誤不然六月二十六日初除尋不行故

九月十三日再除而實錄不能詳記所以也當考六月八日軾乞越州不允七月二十四日軾又以新知定州乞改知越州詔不允政目亦於二十六日書蘇軾知定州資政殿學士知定州許將

知揚州

政目六月二十六日

癸酉尚書省言昨勘會官員因恩賞與占射差遣者到部凡在選久待名次之人皆被陞壓有及一二年已上未到注授者慮亦有可減與別等恩例送吏部子細參照申初謂占射差遣亦或可減與別等恩例仍為事不當得此酬獎或已得轉官循資而涉僥倖者即與刪削

或與改授指射陞名之類非謂必欲全罷占射今吏部一例改換減年磨勘却是歲增轉官蔭補請給本部四選合再行看詳從之 尚書省言訪聞諸路兵夫多被姦惡之人以貸賣熟食為名陰加屠害其部轄官司地分干繫人又以弊源深遠刑名至重不切擒捕只以逃走為名致無由究治緣未有特立告捕賞罰專條其本縣令佐及部轄兵夫官司并地分人同隊兵夫等亦各未有覺察賞罰連坐之法合付刑部立法從之

甲戌都水使者吳安持為太僕卿

政目二十八日三年十一月十八日安持

為都水六年十二月二十六日再任

乙亥左朝散大夫權發遣河北路轉運副使葉伸落發

遣字

緣十月二日來之邵論張景先及葉伸故特出此或削去可也

是月直龍圖閣知秦州呂大忠加寶文閣待制再任

據大

忠本傳去除直龍圖閣知秦州滿歲加寶文閣待制再任行狀云除寶制再任在八年按大忠以元祐五年六月二十八日加直龍圖閣知秦州至八年六月恰滿三歲因附見月末更誤考詳或附年末

